

Belia digesa rebut peluang dalam industri minyak, gas

DE 12/11/2011 Y

Sherell Ann Jeffrey

KOTA KINABALU: Industri minyak dan gas di sini akan berkekalan jadi belia tempatan seharusnya merebut setiap peluang yang ada.

"Sabah adalah wilayah baharu untuk industri itu dengan penemuan beberapa sumber gas di pesisirnya, dengan itu penyediaan pekerja mahir dalam industri yang akan kekal lama di sini itu adalah perlu," kata bekas Yang Dipertua Negeri Tun Ahmadshah Abdullah.

Dengan itu, beliau yakin pada tahun-tahun akan datang, industri ini akan menjana lebih banyak pendapatan untuk negeri dan negara keseluruhannya.

Sumber yang banyak ini akan menyediakan peluang pekerjaan yang bertambah dan tanpa had, katanya.

Ahmadshah berkata demikian di majlis penyerahan sijil dan diploma lanjutan kepada 195 pelajar dari dua buah pusat pembelajaran di bawah UMS Link Holdings Sdn Bhd di sini, Khamis.

Seramai 45 pelajar tamat daripada Akademi Minyak dan Gas Tun Ahmadshah Abdullah (TAS Academy) dan 150 pelajar lulusan UMS Link Centre for Professional Development (UCPD).

Ahmadshah menambah, ramai orang tidak menyedari yang industri minyak dan gas telah berkembang dengan pesatnya di pesisir kita.

"Ramai daripada kita yang beranggapan

minyak dan gas kebanyakannya hanya berpusat di Sarawak, tetapi sejak beberapa tahun lalu, industri itu di negeri kita telah berkembang dengan pembangunan terminal minyak dan gas di Komanis dijangka siap pada 2013."

Beliau menambah, mengikut laporan rasmi, keperluan tenaga kerja untuk Malaysia sehingga tahun 2020 untuk sektor minyak, gas dan tenaga adalah di sekitar 53,000 orang, dengan 21,000 memerlukan kepakaran.

"TAS Academy adalah yang pertama seumpamanya di Sabah dan hari ini kita menyaksikan konvokesyen kumpulan pertama pelajar kita, di mana kesemua mereka sudah memperoleh pekerjaan dalam industri minyak dan gas.

"Jumlah pelajar yang tamat latihan hari ini itu sudah tentu tidak mencukupi, maka kita perlu menambah jumlahnya.

Mungkin institut pengajian tinggi swasta juga boleh dimasukkan latihan ini dalam program mereka.

"Para graduan ini mendapat permintaan tinggi, dengan itu saya harapkan itu akan diteruskan dan mungkin jumlah pelajar akan ditambah," kata Ahmadshah sambil menambah, TAS sekarang ini mempunyai 183 pelajar.

Sementara itu, anugerah pelajar terbaik diperoleh oleh pelajar Diploma Lanjutan TAS, Dani Shamsuddin.